

AKASHVANI AIZAWL

REGIONAL NEWS BULLETIN

HEADLINES (EVENING)

1. Union Minister Nitin Gadkari chuan Mizoram hmasawwna tur kawngpui 6 siamna tur cheng vbch 256 leh nuai 70 chu sawrkar laipuiin a pawm tih a sawi.
2. Union Power Minister Pu Manoharlal Khattar chuan ramchhunga Smart Metre vuah hna kalpui mek chu mipuiten an ngaih pawimawh theih nana hma la turin hmarchhak biala Minister hrang hrangte a ngen.
3. Smart Meter vangà harsatna tawktute huaihawtin vawiin khan Treasury Office kawt, Aizawlah Smart Meter-a lungawilohna lantir a ni.
4. Indian Medical Association (IMA) chuan Influenza A (H1N1) natna hrileng mek avangin mipuite fimkhur turin an ngen.



UNION MINISTER NITIN GADKARI

Union Minister of Road Transport and Highways of India Pu Nitin Gadkari chuan Mizoram hmasawwna tur kawngpui 6 siamna tur cheng vbch 256 leh nuai 70 an pawm tih a sawi.

Pu Nitin Gadkari hian Social media account kaltlangin he thu hi a sawi a, Mizoram hmasawwna atan kawngpui 6 siamna tur cheng vbch 256 leh nuai 70 an pawm tih sawiin kawngpui hi kilometre 82.89 a thui tur ani tih sawiin Central Road Infrastructure Scheme hnuaia thawh tur ani a ti bawk.

Union Minister chuan ramchhunga kawngpui hrang hrang siam niin hmasawwna a thleng mek a ti a, hmun kilkhawr leh tlawhpawhna mumal lo ah a mi cheng ten hmasawwna an neih ve theih nan theihtawp an chhuah tih sawiin kawngpui hmasawwna chuan a mi cheng te eizawwna an hmuh theih nan leh danglamna a thlen dawn tiin zirna, sumdawwna leh hriselna kawngah leh khawsak phungah hmasawwna a thlen dawn tih a sawi a ni.

BJP Mizoram State President Dr K. Beichhua chuan Mizoram kawng siam nana sawrkar laipuiin pawisa tam tham tak a pe chu lawmawm atih thu sawiin kawng chhia nasa takin a tih ziaawm ngei a beisei a ti a, Mizo mipui harsatna hrethiama hmasawwna tur ngaihtuahtu Prime Minister Narendra Modi kaihhruai sawrkar chungah Mizo mipuite an lawm tih a sawi bawk.

<><><>

CM : FCRA

Chief Minister Pu Lalduhoma'n Foreign Contribution (Regulation) Amendment Bill, 2026 chu pass lovin, Mizoram sorkar leh kohhran hruaitute ngen angin Joint Parliamentary Committee ah refer a ni tih a sawi.

Assembly session nimina neihah Tuirial bialtu MLA Pu K. Laldawngliana zawhna chhangin Chief Minister Pu Lalduhoma chuan FCRA Bill 2026 chu Mizoram Sorkar leh Mizoram Kohhran Hruaitu Committee leh Council of Churches in Mizoram aiawhin August ni 6 khan Union Home Minister hnenah Joint Memorandum thehluk a ni a ti a. He Memorandum-ah hian Bill chu withdraw tur leh, withdraw a remlo a nih pawhin siamtha leh tur te in point hrang hrang thehluk a ni tiin hemi hnu hian August ni 9-ah Union Home Minister hnenah he bill hi pass lova Joint Parliamentary Committee a refer mai turin Chief Minister leh MKHC leh CCM hmingin ngenna thlen leh a ni a. He ngenna ang hian August ni 12 khan he bill hi JPC ah refer a ni ta tih a sawi a ni.

<><><>

NORTH EASTERN STATES POWER MINISTER

Union Power Minister Pu Manoharlal Khattar chuan ramchhunga Smart Metre vuah hna kalpui mek chu mipuiten an ngaih pawimawh theih nana hma la turin hmarchhak biala Minister hrang hrangte a ngen.

Hmarchhak state hrang hrang Power Minister leh Minister dang ten vawiin khan Union Power Minister Pu Manoharlal Khattar chu a pisa ah hmuin India hmarchhaka kawlphehta tihchangtlunna tur rawtna leh mamawh hrang hrangte an sawipui a, Union Minister chuan hmarchhak bial state hrang hrangah Smart Meter vuah hna kalpui mek chu chak zawka hma la turin a chah a, Mipuiten smart metre hna thawh dan dik tak an hriatthiam theih nana 'check-metre' vuah chu ngai pawimawh turin a chah a ni.

Inkawmhona ah hian Mizoram Power Minister Pu F Rodingliana leh hmarchhak biala Minister hrang hrangte an tel a, Power System Development Fund (PSDF) kalpui dan tihdanglam a nih tak avanga hmarchhak state hrang hrangin Project an thehluk tawhte special assistance kaltlanga tihhlawhtlin sak turin ngenna an thlen a, India hmarchhak chu tlangram chhengchhia a nih avanga project leh hna dang thawhna kawnga harsatna an tawh thinte Union Minister hnenah hian an thlen a. Tlangram hmun kilkhawra khaw inhlak tak takah current pekna transmission line thui tak kaltir a ngaih thin avangin power supply chatlak loa pek kawngah harsatna a siam nasat avangin hmun kilkhawr zawkah Sub-Station dah belh a tulzia Union Minister hi an thlen a ni.

Mizoram P&E Minister Pu F Rodingliana chuan hmarchhak tihhmasawwna tura ruahman, Ministry 54 ten an budget atanga 10% zel hmarchhak tana an dahhranna tur, 10% Gross Budgetary Support (GBS) hman kawngah langtlang zawk leh tangkai zawka hman a nih theih nan ruahmanna siamsak turin Union Minister Pu Manoharlal Khattar chu a ngen a. A bikin power sector tihhmasawn nan 10% GBS atanga sum tam zawk dah hrang turin a ngen bawk a ni.

<><><>

SMART METER PROTEST

Smart Meter vangà harsatna tawktute huaihawtin vawiin khan Treasury Office kawt, Aizawlah Smart Meter-a lungawilohna lantir a ni.

He lungawi lohna lantirna buatsaihtute zinga mi RTI & Social Activist, Pu Zairemthanga chuan Peaceful protest an buatsaih chhan chu mipui hriattirna awm loa smart meter vuah luh te leh smart meter vuah hnua bill sang lutuk bakah complain in awmzia a neih thin loh avang a ni tiin zir chianna mumal awm loa vuah ringawt leh state dangah nasa taka an dodal laia Mizorama vuah an lo hmanhmawh vak chu nakin zelah harsatna lian zawk a thlen dawn ati a, thingtlang lamah electric bill pek theih loh avanga disconnect an awm hial thei tih a sawi bawk.

Pu Zairemthanga chuan an harsatna chu sawrkarin en fiah se a duh tiin meter vuah tawhte la thla leh vek tur leh la vuah loh pawh en dik hmasak vek a nih hma chuan vuah chhonzawm tawh lo turin sawrkar an phut tih a sawi a ni.

Byte: Zairemthanga

He hunah hian mipui pungkawmte chuan Bill pung nasa lutuk chu sorkarin enfiah tura an duhthu leh enfiah a nih hma chu smart meter vuah chhonzawm an duh loh thu te an au rual a. Resolution an pass bawk a ni.



MZP EXECUTIVE MEETING

MZP chuan Mizo hmeichhe hnamdang pasal neiin Mizo inneih dan Supreme Court-a a khing chu an dem thu sawiin September ni 2 ah Hnamdang nupui/pasal nei lo tura inzirtirna neih an rel.

MZP Executive Meeting vawiinah thukhawm chuan Mizo hmeichhe hnamdang pasal neiin The Mizo Marriage & Inheritance of Property (Amendment) Act, 2026 Supreme Court-a a khing chu an dem thu sawiin September ni 2 ah Hnamdang nupui/pasal nei lo tura inzirtirna chu zirna in hrang hranga neih ni se tih an rel a, MZP President Dr. C Lalremruata chuan kum 2015 atangin September ni 2-ah Hnamdang nupui/pasal neilo tura inzirtirna hi kalpui tawh thin ani tiin tun hnaia Mizo hnam dan Supreme Court hial a khing duh tu Mizo Nu ni thin, hnamdang pasal nei ta chu kum 2023 MLA election dawnah pawh Political party tin te hnamdang pasal nei ticket pe lo turin alo ngen tawh thu an sawi a ni.

Voicecast

Tunhnai khan Pi Meriam L. Hrangchal-in Supreme Court-a Mizo inneihna leh roluah dan siam thatna (amendment) chu khingin Mizo hmeichhia, Mizo ni lo mipa neite chu dik lo takin a thliar hrang a, an fate dikna leh chanvo pawh a laksak nia sawiin thiah leh a dil a, Supreme Court chuan hemi chungchang hi Gauhati High Court Aizawl Bench ah thlen zawk turin a ti a, Chief Justice Surya Kant, Justice Joymalya Bagchi leh Justice V. Mohana thutna bench chuan petitioner aiawhtu counsel hnenah a client chu Delhi-ah kal buai kher ngai loin a chenna ngeiah high court a awm a, chutah chuan kal hmasa turin a ti a ni.



ZPM EXECUTIVE COMMITTEE MEETING

ZPM Executive Committee vawiina thukhawm chuan tuna ZPM Elected OB ni laite ‘Term’ a tawp hunah hruaitu thar thlanga lova ruat ni se tih chu lungrual takin an pawm a, OB thar tur hi Val Upa Council in a ruat ang.

Vawiin khan ZPM General Headquarters Executive Committee Meeting vawi 8-na chu Vanapa Hall, Aizawlah neih a ni a. thutkhawmah hian ZPM Elected Office Bearers (EOB) ni laite an 'term' a tawp dâwn tâk avangin hruaitu thar chu inthlang lova ruat ni se tih lungrual taka pawm tlan a ni.

'Term' thara ZPM General Headquarters Elected Office Bearers (EOB) thar tur ruattu tur atana Val Upa Council (VUC) te kuta dah rawtna chu Executive Committee Meeting hian a pawm a. OB thar ruat turin Val Upa Council (VUC) hian phungbawm sawm ni se tih chu an pawm bawk.

ZPM Gen. Hqrs. Elected Office Bearers hi President, Senior Vice-President, Vice-President leh Treasurer pakhat theuh tur tiin kumina July ni 16-a ZPM Danpui 'amendment' chuan a lo pawm tawh a, September ni 29 khian R. Dengthuama Hall, Mualpuiah ZPM hian Mizoram pum huap General Assembly nei turin ruahmanna a lo siam tawh a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



BLESSINO NURSING SCHOOL

Blessino Nursing School, Maubawk, Aizawl chuan vawiin khan hriselna dinhmun a thlawna enfiah bakah khawpui dung tifaiin an hnattlang.

Blessino Nursing School hian kum tin Nurses Day pualin a thlawnin BP check leh blood sugar test chu vengchhung bakah Bungkawh leh Khatla ah te an nei thin a. Kumin hian a thlawna hriselna dinhmun enfiah bakah vantlang tifaiin thlan an lai bawk a ni.

Blessino Nursing School hi Indian Nursing Council hnuaia awm niin kum 2025 khan Pharmacy Council of India hriatpuina hnuaiah D Pharm zirna seat 60 phalna an hmu a, mumal taka zirna kalpui niin zirlai thiam tak tak an zirchhuak tawh a ni.



SIAHA HEALTH CAMP

Nimin khan Saikao khua a MTP Hall ah Chief Medical Office, Siaha bultumin health camp buatsaih a ni a,damdawi lam thiam ten damlo 500 chuang an en.

Chief Medical Office atanga thudawn danin sawrkar laipuiin hriselna kawnga hmalakna hrang hrang a kalpui program hnuaiah mi 502 hriselna enfiah niin damdawi pawh a thlawna semchhuah a nih thu an sawi bawk.

<><><>

IMA ON INLFUENZA

Indian Medical Association (IMA) chuan Influenza A (H1N1) natna hrileng mek avangin mipuite fimkhur turin an ngen. Hetihruah hian IMA chuan hri kai ten an tuar na lo tih sawiin mipuite tan chiaina tur a awm lo an ti a. Hri kaite chu inenkawlnaah anitibiotic ei mai lo tura chahin antibiotic chu hri thahna anih loh thu an sawi a. Mahni thua antibiotic chi hrang hrang azithromycin, amoxicillin-clavulanate leh cefixime te ei lo turin an hriattir a. Doctor te chawh chauh antibiotic ei turin an chah a ni.

<><><>